
ՀԱՅ ԿՆՈՋ ԴԵՐԸ ՀԱՅԴՈՒԿԱՅԻՆ ՊԱՅՔԱՐՈՒՄ

ԱՌԱՔԵԼՅԱՆ Կ. Մ.

Հայ կինը հայոց պատմության դժվարին ու ճակատագրական պահերին անմասն չի մնացել մեր գոյապայքարից, որը վկայում է հայտուհու խիզախության, քաջության, հերոսության և նպատակասլացության մասին: Նա միշտ մեծարվել է, համարվել սրբություն, եղել առաքինի, ազնիվ ու համբերատար: Հայր կնոջ նկատմամբ միշտ մեծահարգ է եղել, սրբացրել ու պաշտել է մայրերին: Շատ հայուհիներ ֆիդայիների հետ կողք կողքի պայքարել են թշնամու դեմ, արհավիրքի ժամին դարձել քաջ զինվոր և կյանքի գնով պաշտպանել են իրենց բույնն ու ձագուկներին:

XIX դարի վերջին քառորդին, երբ Խ. Աբովյանի, Մ. Նալբանդյանի, Մ. Խրիմյանի, Բաժբու, Մ. Փորթուգալյանի և այլոց հայրենասիրական գաղափարների ազդեցության ներքո պայքարի դուրս եկան նաև հայ կանայք. գործունեություն ծավալեցին «Ազգանվեր հայուհեաց Միություն», «Միացյալ ընկերությունը Հայոց», «Դպրոցասեր տիկնանց ընկերություն» կազմակերպությունները: Դարավոր ընդմիջումից հետո ազատ ապրելու ծլարձակած սերմերն իրենց երկար սպասեցնել չտվեցին. հայ կնոջ սխրանքներ արձանագրվեցին Սասունի, Ջեյթունի, Վանի և այլ հերոսամարտերի ընթացքում: Շատ կին հայդուկներ իրենց հերոսությամբ չէին զիջում տղամարդկանց: Անգամ եթե կովի դաշտում հայ կնոջ մասնակցությունը համեմատաբար սահմանափակ է եղել, ապա թիկունքում՝ անհամեմատ նշանակալի. նա հսկել է հայդուկի թաքստոցը, անհրաժեշտ տեղեկություններ, հաց ու ջուր հասցրել, վիրավորների վերքերն է բուժել և գաղտնի նամակներ տեղ հասցրել: Հայ կինը որդուն պատգամում էր քաջ լինել, անգամ սպառնում էր. «Հարամ կ'անեմ տուած կաթս, թե որ իյնաս թուրքերու ձեռքը»¹: Սրանք, հիրավի, մայրերի արտաբերած՝ մեծ խորհուրդ բովանդակող անանց ու խիստ խոսքեր են: Նշենք, որ հայդուկային կոիվներին հայ կանանց մասնակցությունը հայդուկային կանոններով ընդունված չի եղել, հայ տղամարդիկ դա համարել են անթույլատրելի: Իրականում հայ կնոջ մասնակցությունը մշտապես բարձր է գնահատվել, սակայն վեհանձն հայ տղամարդը թույլատրելի չէր համարում վտանգի ենթարկել իր օջախի պահապանին. «Եւ ինչու՞ չէ, առաւելութիւն մը մեր յեղափոխական շարժման, որուն

¹ Դաբբինեան Վ., Գին ազատամարտիկներ (Ասպար, փետրուար, թիւ 2, 1993, էջ 3):

նուիրումով կը մասնակցէր հայ կինն ալ, Սօսէի եւ Շաքէի տիպարներ տալով Հայոց արիւնալի ազատամարտին»², - գրում է Ավոն: Ստեղծված ավանդույթն ու չգրված, սակայն սրբորեն պահպանվող կանոնները չխախտելու նպատակով հայ կանայք կոիվներին հաճախ մասնակցում էին տղամարդու ծպտյալ հագուստով:

Երկար փնտրեցինք, սակայն պարզվեց, որ կին հայդուկների մասին թե՛ հուշագրություններում, թե՛ արխիվային փաստաթղթերում և թե՛ մասնագիտական գրականության մեջ տեղեկությունները շատ չեն: Հայ հայդուկային պայքարի հայտնի դեմքերից է եղել Աննա Մայրիկը՝ Խուլբի շրջանի Ահարոնք գյուղի հեղափոխական ոգին: Նա Սասնո լեռնաշխարհի այն խիզախ կանանցից էր, որն իր ողջ կյանքը նվիրաբերեց ժողովրդին ու հեղափոխությանը³: Կին, որն իր ազդեցությունն ուներ լեռնաշխարհի բնակչության վրա, և որին հաշվի էին առնում ոչ միայն հայ իշխաններն ու քուրդ աշիրեթապետերը, այլև շրջանի թուրք կառավարիչները: Ժամանակակիցների տեղեկացմամբ 1875-1915 թթ. ընթացքում Աննա Մայրիկն հարաբերվում էր Տարոնի բոլոր վանահայրերի, աշիրեթապետերի և թուրք կառավարիչների հետ: Աննան իր գորավոր նկարագրով, համարձակախոսությամբ և խելքով գրավել էր բոլորի ուշադրությունը: Հերոսուհու իսկական տիպար էր նա: 1880-1890-ական թթ. բարենորոգումների հարցի շուրջ հաճախ քննարկումներ ու վեճեր է ունեցել Վարդան վարդապետի, Մ. Տամատյանի, հոգևոր առաջնորդ Ն. Խարախանյանի և նշանավոր այլ այրերի հետ: 1880 թ. հայերը հրաժարվում են քուրդ աղային վճարել «10 փարա» կոչվող հակաօրինական տուրքը, որի համար Միրզա աղան խաբեությամբ սպանում է Ահարոնքի իշխան Գրգոյին: Աննա Մայրիկի կոչով և գլխավորությամբ ոտքի էլած ահարոնքցիները հարձակվում են Միրզա աղայի տան վրա՝ այրելով և հողին հավասարեցնելով այն: Թեև Միրզա աղան, խույս տալով հայերի վրեժխնդրությունից, փախել էր լեռները, սակայն հայերի բարձրացրած աղմուկն ու ըմբոստությունն այնքան ուժեղ ու ազդու էին, որ թուրքական իշխանություններն ստիպված նրան բանտարկում և կախաղան են հանում: Այս դեպքերից հետո Աննան դառնում է պատմական անձնավորություն, նրա մասին տարբեր պատմություններ են շրջանառվում և նույնիսկ երգեր հյուսվում:

Թուրքական բարենորոգումները անհասկանալի էին Աննա Մայրիկի համար: Նա պահանջում էր, որ ինչպես քրդերն ու թուրքերը, այնպես

² Յեղափոխական ալպում, Պէրյութ, 1965, էջ 40:

³ Այստեղ «հեղափոխություն» բառն օգտագործվում է ազգային-ազատագրական պայքարի իմաստով:

էլ հայերը ինքնավարություն ունենան. «Ինչպէս քիւրտերը եւ թուրքերը Պէկլըկ ունին, հայերն ալ քաղաք մը, լեռնամաս մը պէտք է գրաւեն եւ իրենց իշխանութիւնը հիմնեն... Աննա Մայրիկի պահանջը անկախութեան պահանջն էր...»⁴, - գրում է Կ. Սասունին: Նա առաջարկում էր ստեղծել ազատված մի փոքրիկ տարածք, թեկուզ Սասունի շրջանում, որն անկախ կլինէր թուրք-քրդական իշխանությունից⁵: Մակայն շատերն Աննա Մայրիկի անկախության ու ազատության պահանջները չէին ըմբռնում: Լեզենդար այդ կնոջը թուրքերը ողջակիզեցին 1915 թ. Տեր Զորում՝ ի թիվս այլ աքսորյալների⁶:

Նշենք, որ հայդուկային պայքարին մասնակցած հայուհիների մի մասի վերաբերյալ մեզ որոշ տեղեկություններ այնուամենայնիվ հասել են, սակայն շատերի դեպքում հայտնի են սոսկ նրանց անունները և գործելու վայրերը: Այսպես՝ Սարգիս Կուկունյանի խմբում կռվել է հերոսուհի Մաքոն, Քյոփրի Քոյուն երկար տարիներ գործող Գրիգոր Տեր-Մկրտչյանի հայդուկային խմբում կռվել է Մարիամ Մակարյանը, որը հայտնի էր Մարո անունով, Մարգվանում հայտնի ֆիդայուհի էր Մարինոսը, որը գործել է Շմավոնի հետ⁷, Գևորգ Չաուշի խմբում կռվել և 1905 թ. զոհվել է Խարս գյուղից Զարուհին (Զըրե), կին հայդուկներից էր նաև Ալվառինջ գյուղից Խանիկը: Հայտնի հայդուկ էր Ազապին, որը քաջասիրտ Տուրքախի կինն էր: «Ազապի, - նկարագրում էր նրան ժամանակակիցը, - յեղափոխական խառնուածքով նուիրեալ հայուհի մըն էր... իր արիւթեամբ եւ հայրենասիրութեամբ արժանի գոյգն էր Տուրքախին: Ան իր ամուսնոյն պէս զէնքի սիրահար, գիտէր նաև գործածել զայն յարմար վայրկեաններուն»⁸:

⁴ Սասունի Կ., Աննա Մայրիկը (Հայրենիք, 1953, թիւ 11, էջ 8-9):

⁵ Նույն տեղում, էջ 9:

⁶ Տեր Զոր անապատում, ուր հարյուր հազարավոր անմեղ հայեր գտան իրենց գերեզմանը, 1915 թ. մայիսի 12-ին իր մահկանացուն կնքեց Աննա Մայրիկը: Նրա աչքի առաջ զազանաբար մորթում են 6 երեխաներին: Իսկ Արշալույսին, որը թուրք ոստիկանի հրամանով նետվել էր Եփրատը, մի արաբուհի փրկում է: Ավելի ուշ քեռիները երեխային գտնում և տանում են Բեյրութ:

⁷ Ս. Սապահ-Գիլեան, Փոքր-Հայքի Յիշատակներ, մասն Առաջին, Չիկագո, 1917, էջ 129-130:

⁸ Յեղափոխական ալպով, Տուրքախ (Յարութիւն Այվազեան), էջ 317:

Անգուզական կերպար էր Սոսեն՝ Սոսե Մայրիկը⁹ (Աղբյուր Սոսե, 1868/9-1953 թթ.)՝ Աղբյուր Սերոբի կինը, որն իր տիպարով և սերունդներին կտակած պատգամներով մեր ազգային ինքնության և հպարտության աղբյուրը դարձավ։ Սոսեն արդեն լիովին պատրաստ էր ֆիդայական կյանքին, երբ 1895 թ. Սերոբը վերադարձավ պանդխտությունից և հայ հեղափոխականի «Տղա՛ք, առանց հացի մնացե՛ք, առանց գէնքի մի մնաք» կոչ-հորդորով պայքարի դրոշմ պարզեց ողջ շրջակա տարածքներում։ Հայդուկային խմբում կնոջ առկայությունը բացառող չգրված, սակայն սրբորեն պահպանվող կարգը այս դեպքում շրջանցվեց, քանի որ Սերոբին և նրա ընտանիքին անընդհատ հետապնդում էին թուրքերը, և նրանց կյանքը պահպանելու համար Սերոբն ստիպված էր Սոսեին իր հետ տանել Մասունի լեռները. «Մասունի ֆետայիներու փաղանգը գուրգուրանքով ընդունեց զինքը որպէս պարագլուխ»¹⁰, - գրում է Ավոն։ Ամուսնու, հրամանատարի և անվեհեր հայդուկայետի կողքին ազատասեր հայուհին կարողացավ դիմակայել բոլոր դժվարություններին և փառքի արժանի էջեր գրեց հայ ֆիդայական շարժման պատմության մատյանում¹¹։

Աչքի ընկնող կին հերոսուհիներից է եղել Մոկունք գյուղից Եսթերը, որը քարոզում էր ուտքի ելնել թուրքի ու քրդի դեմ։ Նա հանդգնորեն հրապուրում էր քուրդ աղաներին, և կամ ինքը կամ էլ իրենց ցեղակիցների ձեռքով սպանել տալիս նրանց¹²։ Հայտնի ֆիդայուհի էր Մոկունք

⁹ Ծնվել է Մասունում՝ Նեմրութ լեռան փեշերին գտնվող Թեղուտ գյուղում, բազմանդամ ընտանիքի տեր Մարգար Դրո-Աստանտուրի հարկի տակ։ Հազիվ 13 տարեկան էր, երբ սասունցի հայերի ավանդության համաձայն՝ ծնողները ցանկանում են ամուսնացնել Սոսեին։ Սակայն բարձրահասակ և գեղադեմ Սոսեն ըմբոստացման իր առաջին և բախտորոշ քայլն է կատարում, երբ ծնողների առաջարկած թեկնածուներին մերժելով՝ որոշում է կյանքը կապել Խչեենց Սերոբի հետ, որի անձն ու հայրենասիրությունը հեղափոխական տրամադրություններ ունեցող հայուհու համար մինչ այդ արդեն ներշնչման աղբյուր էին դարձել։ Այդ տարիները քրդերի և թուրքերի անհրաժեշտությունների ու շահատակությունների դեմ հայկական ըմբոստացման առաջին բռնկումների, ինչպես նաև ապրուստի ապահովման դժվարին պայմանների հաղթահարման համար նաև պանդխտության մեկնելու ժամանակաշրջան էր։ 1890-ականների սկզբին կնոջն ու անդրանիկ զավակին՝ Հակոբին թողած, Սերոբը մեկնեց պանդխտության։ Ընտանեկան օջախի պաշտպանության հոգսը, անհրաժեշտության դեպքում նաև զենքով քրդական ամենօրյա գողությունների ու թալանի դեմ պայքարը Սոսեի մեջ կոփեցին դիմադրողականության ոգի։

¹⁰ Աւօ, Սօսէ Մայրիկ (Յեղափոխական ալպում, 1965, էջ 38)։

¹¹ Հայ ժողովրդի ազգային-ազատագրական պայքարի դուցազնուհին՝ Աղբյուր Սոսեն, վախճանվեց Եգիպտոսի Ալեքսանդրիա քաղաքում։

¹² ՀԱԱ, Արտասահմանից ստացված վավերագրական նյութերի հավաքածու, ֆ. 420, գ. 16, 8, թ. 23։

գյուղից Մոկունաց (Միրզոյան) Լուսին, Քեռի Բարսեղի խմբում կռված Ցրոնք գյուղից Շուշանիկը (Ցրոնքի Շուշան)¹³ և այլք:

Հարկ է նշել, որ կին հայդուկները մեծ դեր են ունեցել նաև զենք տեղափոխելու գործում: Օրինակ՝ աննկուն զինատար էր Մարո Ղարաքեշիշյանը՝ Սևաբեցի Սաքոյի կինը: Այսօր քչերին հայտնի այդ հերոսուհու շնորհիվ բազմիցս զենք ու զինամթերք է փոխադրվել Արաքսից այն կողմ: Նկատի ունենալով նրա հերոսական կերպարը՝ կարող ենք ասել, որ միայն Մարոյի նման նվիրյալները կարող էին Ռուսաստանից և Միջին Ասիայից այդքան մեծ քանակի զենք տեղափոխել հենց իրենց՝ ռուսների միջոցով և այն ծառայեցնել ազգային-ազատագրական պայքարի սուրբ գործին: Երբ Մահկանաբերդի արծիվը՝ Սևաբեցի Սաքոն, աշխուժորեն զբաղվում էր զենք հայթայթելու և դեպի Ավետյաց երկիր տեղափոխելու բարդ ու վտանգավոր գործով, հանդիպում էր շատ շատերի, դիմավորում էր բազմաթիվ զինատար խմբերի, իսկ նրան անհրաժեշտ տեղեկությունները հասնում էին Մարո Ղարաքեշիշյանի միջոցով: Եղավ ժամանակահատված, երբ զենք ու զինամթերք հայթայթող և ազգային-ազատագրական պայքարի ազնիվ ու անաղարտ զինվոր Մարոյի «մատը խառն էր ամեն ինչում»¹⁴:

Բիթլիսցի հարուստ ընտանիքի զավակ էր Շողերը, որի առաքելությունն ազգի ազատագրության սուրբ գործին զինվորագրվելն էր: Բիթլիսցի քաջ հայդուկ Մուշեղի հետ ամուսնանալուց հետո ավելի ոգևորված էր գործում: Հայ մատնիչ Խաչոյին սպանած Մուշեղի մասին տեղեկություն ստանալու համար ոստիկանները Շողերին ծեծում են, սակայն ոչինչ չկարողանալով կորզել նրանից՝ բանտարկում են: Անսասան Շողերը, ժամանակակցի վկայությամբ, որպես «...եզ առիւծի մը խրոխտ կեցուածքով» քաջաբար պատասխանում էր. «Եթէ ֆէտային կը փնտռէք, ան, մատնիչ Խաչօն սպաննելով փախաւ...»¹⁵:

Ազատագրական պայքարում աչքի է ընկել նաև կին զինատար հայդուկ Ծաղիկը, որը զինակցել է Դերիկի վանքի հայդուկների հետ, մասնակցել է նաև Դերիկի 1894 թ. ինքնապաշտպանական կռիվներին և զենքի փոխադրմանը: Ձենքի փոխադրման գործում մեծ դեր է խաղացել Ուզունլուծի (Յոզկաթ) հերոսուհի Գոհարիկ Մարգարյանը: 1890-1908 թթ. Գոհարիկն ամենատարբեր միջոցներով և մեթոդներով զենք ու զինամթերք է տեղափոխել Արևմտյան Հայաստան՝ անգամ ջահերի մեջ թաքցնելով:

¹³ Նույն տեղում:

¹⁴ Բեգլարյան Ի., Մահկանաբերդի արծիվը. Սևաբեցի Սաքո, Ե., 2010, էջ 40, 180, 250:

¹⁵ Արշակ, Հայ յեղափոխութեան արշալոյսի հսկաներէն, Պիթլիսցի Մուշեղ, Կ. Պոլիս, 1919, էջ 19:

ելով դրանք: Ի դեպ, այդ ջանք-թաքստոցներից մեկը պահպանվել է և այժմ Երևանի Զորավար Անդրանիկի անունը կրող ֆիդայական շարժման թանգարանում է:

Գևորգ Չավուշի զինակիցներից է եղել կին հայդուկ Եղսոն: Հայտնի են եղել նաև Հայո-Հայաստանը, Սաթենիկ Մատինյանը (Ծաղիկ), Սաթո Օհանջանյանը, Սատան Սիմեյանը, Գայլ Շահենը, Խազալը, Մավին, Աղավնի Վարպետյանը, Սրբոն, Սևոն, Իսմոն և ուրիշներ¹⁶, որոնց գործունեության մասին, ցավոք, դարձյալ քիչ բան է մեզ հայտնի: Տարբեր աղբյուրներում հիշատակվում են նաև ֆիդայուհիներ Խաթուն Գոն-տրաջյանի, Կոբեցի Շուշանի, Մարիամ Չիլինգարյանի, Խանում Քեթենջյանի, Ազնիվ Պուճագյանի անունները: Փոքր Հայքի ֆիդայուհիներից և Արամի մտերիմ գործընկերներից էր Սեբաստիայի Թոստրակ գյուղացի Էլմաս Դարբինյանը (Մալեմեզյան), որին կոչում էին «Հօրքուր»։ «Հնչակեան բոլոր խմբապետները գիտեին թե ով է Հօրքուրը և ինչ է անոր դերը...», - փաստագրում է ժամանակակիցը¹⁷:

Մալաթիայի գավառում Արիֆ բեյի գազանությունների դեմ պայքարում աչքի էր ընկել ֆիդայուհի Վարդուհին: Երբ մի անգամ Արիֆ բեյն իր խմբով գալիս է Մալաթիայի գավառ և տեսնում գեղեցկուհի Վարդուհուն՝ առնանգում է: Սակայն վերջինս կարողանում է ընթացքի ժամանակ ձիու վրայից թռչել և փախչել: Այնուհետև, խուսափելով բեյի հետապնդումներից, եղբոր՝ Պետոյի հետ փախչում է սարը, դառնում հայդուկ, ստեղծում իր խումբն ու վրեժ լուծում¹⁸:

1913-1914 թթ. տարածված էր ֆիդայուհի Լույա Սասունի անունն ու փառքը: Հայտնի է, որ նա ամերիկյան քոլեջի շրջանավարտ էր: 1913-1914 թթ. մասնակցել է Սասունի, Էրզրումի հայդուկային շարժումներին, իսկ 1918 թ.՝ Սարգարապատի, Աշտարակի, Եղվարդի կռիվներին: Նշենք նաև 1915-1916 թթ. Ուրֆայի, Շատախի, Մուսա լեռան, Վանի և մյուս ինքնապաշտպանական հերոսամարտերի մասնակից հերոս հայուհիներին, որոնցից շատերի անուններն ու ինքնությունը, ցավոք, անհայտ են այսօր:

Այդ խոնարհ ու անձանոթ հերոսուհիները, որոնք թե՛ մարտի դաշտում, թե՛ թիկունքում պայքարել են մեր ժողովրդի ազատագրության և հոգևոր ու մտավոր զարգացման համար, հաճախ շեղվել են հայ հասարակության մեջ ընդունված նորմերից ու խոր արմատներ ձգած սովորույթներից, գատվել հայ կնոջ ավանդական և նահապետական

¹⁶ Բեգլարյան Ի., Հայդուկներ, Ե., 2010, էջ 384:

¹⁷ Միրվարդ, Արամ Աչքապաշեան (Հերոս Փոքր Հայքի), Փրովիտենս, 1957, էջ 115:

¹⁸ Ալպոյաճեան Ա., Պատմություն Մալաթիոյ հայոց, Պէյրուի, 1961, էջ 866:

*կերպարից՝ ի շահ հայրենիքի ու սեփական ժողովրդի լուսավոր ասպ-
զայի*¹⁹:

РОЛЬ АРМЯНСКОЙ ЖЕНЩИНЫ В ГАЙДУКСКОЙ БОРЬБЕ

ԱՐԱԿԵԼՅԱՆ Կ. Մ.

Резюме

В конце XIX в. в национально-освободительном движении и гайдуksкой борьбе значительную роль сыграли также армянские женщины. Женщины-гайдуks так же, как и мужчины-фидайи, посвятили жизнь борьбе за свободу родного народа, доказав свою готовность наравне с мужчинами-фидайи, посвятили жизнь борьбе за свободу родного народа, доказав свою готовность наравне с мужчинами погибнуть за свободу, честь и достоинство.

Их героизм послужил примером для будущих поколений, в частности, для женщин, участвовавших в Арцахской войне и отстаивавших свободу Арцаха.

THE ARMENIAN WOMEN'S ROLE IN THE HAIDUK STRUGGLE

K. ARAKELYAN

Abstract

During the national liberation movement and the hajduk struggle at the end of the XIX century a significant role was played by the Armenian women, which appeared to be the legacy of the Armenian woman's heroic character throughout the centuries-old history of Armenia.

The Armenian hajduk women devoted their lives to the sacred struggle for their nation's freedom just like the fidayi men. Those heroines' actions proved to the world their readiness to stand by the Armenian man at the hardest times, to fight and to fall for freedom and honor.

The natural continuation and apparent proof of the heroic character of the Armenian fedayi woman was the fight of the Armenian women in the hot spots of the battles against the Azeri invaders during the Artsakh heroic war. Great many generations have been brought up on the example of their heroism.

¹⁹ 1988-1994 թթ. Արցախյան հերոսամարտը դարձյալ մեկ անգամ ասպարեցում է մեր ասածը, որ հայ կինը ազգի համար օրհասական պահերին միշտ պատրաստ է դառնալ հայրենիքի համար պայքարող զինվոր: Շատ հայուհի-ազատամարտիկներ, ֆիդայուհիներ մասնակցեցին ադրբեջանական նվաճողների դեմ ծավալված ազգային-ազատագրական արցախյան պայքարին, որտեղ նրանցից շատերը դարձան նահատակներ և անմահացան: Հայուհու հերոսացումը շարունակվում է նաև մեր օրերում: